

7

2019

Нюп

Нальчикни 75-чи
прогимназиясыны
сабийлери

6+

ISSN 0207 - 6543

«Нюр» журнал Минги тауда

Багъалы сабийле! Сиз билемисиз биз къаллай жерлени иелери болгъаныбызны? Бизни къаллай жигит жашларыбыз болгъанларын? Биз барыбыз да – Минги тауну балаларыбыз! Анга шагъат ёмюрледен да Минги тауну тѣппесине ёрлерге базынган уланларыбыз бола келгендиле: Джапуланы Джатчи, Сотталаны Ахия, Хачирланы Хыйса, Хаджиланы Сейит, Тилланы Юсюп, Ёлмезланы Абдул-Халим, Хаджиланы Азнор, Аккайланы Азнаур эм кѣп башха жигитлерибиз. Быйыл, «Нюр» журналны хурметин кѣре, Къарачай-Малкъарны жаш тѣлюсюню келечилери, ол санда жаш журналист къызла **Темуккуланы Аминат** бла **Рахайланы Диана**, «Нюрчюгюбюзню» Минги таугъа чыгъаргъандыла. Ол къууанч туююлмюдю, таулу къызла, – къоркъмагъанлай, жунчумагъанлай, аллай бийикликге ёрлегенлери?! Биз окъуучуларыбызны аллай ариу байрам бла алгъышлайбыз. Билебиз, сабийле, сизни ичигизде да болмай амалы жокъду Ата журтун, миллетин, тилин, динин бу къызлача суйгенле. Сиз жай солуудан окъуугъа къайытсагъыз, Диана бла Аминатны «Нюрню» редакциясына чакъырып, барыгъызны да ала бла танышдырыр муратыбыз барды.

САБАНЧЫЛАНЫ Арипа



Суратда Темуккуланы Аминат
"Нюр" журнал бла

2019 – КЯЗИМНИ ЖЫЛЫ

Кязимни жыр дүниясындан

*Туугъан жеринги этмей тас,
Болургъа хазыр эдинг таш,
Кюнюнго сыйыргъанда чарс,
Ташлагъа да болдунг къардаш...*

Магомед МОКЪА



Уллу, гитче да Кязимни назмуларын кёлден биледиле, жырчыла аны жырларын айтадыла, суратчыла суратын ишлейдиле, артистле сыфатын къурайдыла, назмучула ахшы назмуларын анга жоралайдыла...

Аллахны бла ёхтем халкъыны къулу Кязим!

Бюгюн Кязимни жырлары, Кязимни назмулары деп айтханда, кесинги бек ахшы, бек жууукъ адамынги атын сагъынганча боласа.

Айхайда, малкъарлылагъа Кязим байракъды, Минги Тауча, аллай деменгилиди, тюзлюк сёзню тейрисиди.

Бир белгили адам айтып, мен кесим эшитген затымы сизге да билдирирге сюеме.

Бир жол Кязим, немисли солдат колхоз амбарны киритин буза тургъанын кёрюп, фашистни аллына сюелип, орус тилде:

– Это колхозный, – деп, ол киритни бузаргъа къоймады.

Ол фашист, ачыуланып, автоматын Кязимни юсюне буруп, кеситинде къаты къычырды. Ол кезиуде алайтын ётюр баргъан бир

малкъарлы тиширыу, аны кёрюп, фашист бла Кязимни арасына сюелди да, ол фашистге:

– Начас, итден туугъан, бу Кязим хажиди, кёрмеймисе, кетер керохунгу, – деп, хахай этди.

Сейир туюклюдю ол, - битеу Европаны аякъ тюр этип келген фашист мурдарны санлары тюрдюле, автоматын энишге бошлады...

Баям, былайда Кязимге тюзлюгю болушханды. Ол тиширыу да Кязимге базынып, аны тюзлюгюне ийнанып, алай сюелгенди мурдаргъа къажау.

Кёчгюнчюлюк жыллада да Кязим тюзлюк хорларыгъын халкъгъа айта тургъанды:

***Бузулмагъыз къыраллыкъгъа,
Киши жерде тургъанлыкъгъа!
Ат чаришде сыналады,
Азап кёрмей ким къалады?
Хайт дегиз, айып алмагъыз,
Ишде артха къалмагъыз,–***

деучю эди Кязим.

ЭТЧЕЛАНЫ Музафар



ЁЛМЕЗЛАНЫ Мурадин

СЕГИЗИНЧИ ИНГИР

Баръаны. (Аллы "Нюр" журналны
2-чи 2019 санындады)

АЙОГА

Эртте-эртте Айога деп бир ариу къыз болгъанды.

Халкъ аны асыры эркелетгенден, ол кесин асыры ёхтем жюрютюп тебиреди.

Эрке Айога, жез тазны юзmez бла ариу жылтыратып, кесине къарап бир башласа, ариулугъундан кёз айыралмай, ингирге дери олтура эди.

Алай эте, къыз эринчек болду.

Бир кюн анасы Айогагъа:

– Айога, суубуз жокъду, суу алып келсенг а, – дегенди.

Айога уа:

– Суугъа кетсем а? – дегенди.

– Сен а чырпыдан тут, – дегенди анасы.

– Чырпы сынса уа? – дегенди Айога.

– Сен а юлкюден тут.

– Къолума шинжи кирсе уа?

– Къол къапла кий, – дегенди анасы.

– Жыртылсала уа? – дегенди Айога, тазда ариу сыфатындан кёз алмай.

– Да, тигерсе.

– Ийне сынса уа?

– Чирги ийне бла тигерсе, – дегенди от жагъада уюгъун жамай тургъан атасы.

– Бармагъыма чанчсам а?..

– Суугъа мен барайым, – дегенди хоншу къызчыкъ. Дегенди да, суу алып келгенди.

Айоганы анасы, тылы басып, гютюле биширди.

Эринчек Айога:



– Анам, гюттю бер, гюттю бер! – деп, гузаба этгенди.

– Иссиди, къолунг кюйсе уа? – дегенди анасы

– Къол къапла киерме.

– Къол къапла жибипдиле.

– Кюнде кепдирirme.

– Кюнде кепдирсенг, къатарла да къалырла.

– Мен а талкъыда ийлерме.

– Ариу къолларынгы ачытырса, – дегенди анасы. – Андан эсе мен гюттюню хоншу къызчыкъгъа берейим. Ол ишден къоркъмайды.

Алай айтханды да, гюттюню хоншу къызчыкъгъа бергенди.

Айога ёпкелегенди. Сора, суугъа баргъанды да, суу бетинде ариу ауанасына къарап тохтагъанды.

Хоншу къызчыгъ' а гюттюсюн ашай эди.

Айога анга жашырын къарай турганлай, боюну созулуп башлагъанды.

– Ма, аша, мен къызгъанч туююлме, – деп, къызчыкъ гюттюсюн Айогагъа узатханды.

Айога бютюнда къозугъанды. Ол, бармакъларын кенг жайып, къолларын къакъгъанды да, къоллары къанатла болуп башлагъандыла.

– Манга жукъ да керек туююлдю! – деп къычыргъанды къыз. Сора, аягъы тайып кетип, суугъа жыгъылгъанды да, къаз болуп къалгъанды.

– Ах, къалай ариума мен, ах, нечик ариума мен! – деп жырлагъанды Айога.

Ол ана тилин унутуп къойгъунчу, алай айтып жырлагъанлай тургъанды.

Энди Аюганы эсинде жаланда ёз аты къалгъанды. Нек къалгъанды дегенг, биз ол ариуну башхаладан айырма билир ючюн.

Ол бюгюн да, адам кёрсе:

– Аюгак-гак-гак! Аюгак-гак-гак! – деп, къычырып башлайды.





Ирина КОВАЛЕНКО

БИРИНЧИ АТЛАМ

Дыгы! Дыгы! Биринчи
Атлам кыйынды нечик!
Ма бир, эки... Бир-эки
Атламчык кюден этдим.
Сора тохтаялмадым,
Жюрюп, чабып башладым.

КЪАЙДАСЫЗ?

Къайдасыз, аначыгъым?
Эгешчигим, жанчыгъым?
Аттям, аппам, ыннам да?
Узакъдамы, мындамы?

КИРПИЧИК

Кирпи, кирпи, кирпичик,
Ийненг жютюдю нечик!
Къайдан да жыйгъанса бу
Къадар ийнени, табу?
Айтчы назыдан эсе,
Наратданмы огъесе?
Быллай жютю ийнеле
Боладыла гулледе.
Мени ыннам да ийне
Тутады биргесине,
Быстырдан кирпи, назы
Тигип, этеди хазыр.

ТАШ МАКЪА

Таш макъа, таш макъачык!
Келегинг да бир тапчык,
Бир айбатды, бир омакъ,
Къатыдан а – таш доммакъ.
Бир узакъ болур жолунг,
Келегинг тыя болур,
Къуусанг да сау кюн къыстау,
Мени жетмезсе къысха.

ГУРТУПАНЫ Салих кечюргенди



Сабанчыланы Миланчыкъ
(1 жыл)





ЖУКЪУЧУ

Тсс-с-с! Къоясыз къачырып
Жукъусун Мамурачны.
Мамурач мамырчыкъды,
Хар кимге да жубанчы.
Китап да окъур, ачып,
Жумушакъ Мамурачым.
Къоянчыкъны юсюнден
Жомакъны бек сюеди.
Китапчыкъны окъуду,
Жукълар заманы болду.
Тынч туругъуз, солумай,
Ариу тышчюгюн бузмай.



САУ КЕЛ, БАЛ ЧИБИНИМ

– Не кеп къалдынг, бал чибиним,
Аллай бир къайда кечиндинг?
– Къуйкъаланган бостанда,
Балшырын кепдю анда,
Жыйгъанма балшырынны,
Толтургъанма батманны.
Ол алтын бетли балдан
Санга да юлюш салдым.



Мен Кючменланы Расулну жашы Микаилма, Нальчик шахарны 3-чю школунда 4-чю классдан башлап, ана тилибизни дерслерине бек скойюп жюрюйме. Энди эслей барама тилибизни ариулугъун. Ана тилден окъутхан устазыбыз тилибизни, халкъыбызны юсюнден кеп сейирлик шартла келтиреди, айтады, ангылатады. Устазыбыз бизни «Хар затны да билирге сюеме» («Хочу всё знать») деген халкъла аралы, региональный интеллектуальный, конкурсха къатышыргъа юйретеди. Ол конкурсдан сора ана тилибизни, адабиятыбызны юсюнден да кеп шартланы билирге суйгенме. Андан билеме бизни ана тилибиз кеп ёмюрлени сюрюп келгенин.

Мен школну бошасам, малкъар халкъны алимлерича, тарыхыбызны теренирек къазарча, тинтирча, аллайладан болургъа сюеме: Мызыланы Исмайылча, Журтубайланы Махтича, Биттирланы Тамарача.



Не ючюн сюеме ана тилибизни? Бизни тилибизни ариулугъу, узакъ ёмюрледен бери тазалай сакъланнганы ючюн.

Сизге уллу хурмет бла Кючменланы Микаил.

КАНУКОВА Зарина

ТАТЛЫХАНЧЫКЪ

Бармагъымда
Татлыханчыкъ.
Эсчигингде –
Татлы хантчыкъ.
Кетсе уа юйюне,
Учуп,
Тура болур
Ачдан жунчуп.

– Къоркъуп турмай, –
Дедим анга, –
Уч да кет, –
Дедим, – ананга.

Ол алыкъа гитчечикди. –
Кюлмегиз сиз
Татлыханнга.



Жаникаланы Ясмина, 5 жыл



«Жылны юйретиучюсю – 2019»



«Жылны юйретиучюсю–2019» деген кырал даражалы эришиуню республикалы кесеги алгъаракълада Нальчикни 75-чи номерли прогимназиясында кыуанчлы халда бардырылгъанды. Юйретиучюлени конкурсларын КъМР-ни жарыкъландырыу, илму эм жаш тёлюню ишлери жаны бла министерство-су бардыргъанды.

Конкурсха кеслерини районларында алчыла болуп чыкъгъан онюч юйретиучю къатышханды. Ала тёрт кюнню ичинде жюрини аллында сабий садда ишлерин къалай бардыргъанларын, жангы методикаланы юйретиу технологияланы, ала бла бирге уа билим бергенде, саурукъ сакълауда кеслерини хунерлерин кёргюзтгендиле.

Айтып кетейик, бу кызыланы ичлеринде таулу юйретиучюле биринчи кюнден окъуна кеслерин айырмалы кёргюзтдюле. Сёз ючюн, Элеккуланы Наталья бла Гуппойланы Асият сабийчиклеге ачыкъ дерсле кёргюзтгенде, билим берген бла къалмагъанлай,

Ата журтларын, ана тиллерин сюерге, жарыкъ кёллюле болургъа, жашауда биринчиле болургъа юйретгенлери кыуандырды. Конкурсха къатышханла гинжи театрла, миллет тепсеуле, эшиу кружокла, дагъыда аныча амалланы хайырланганларын кёргюзтдюле. Была барысы да бирча кючлю юйретиучюле болгъанлары ючюн журиге сайлау этерге тынч болмады. Кёп сагъыш этип, кенгешип, биринчи жерни Къашхатаудан Чеченланы Шамил атлы



Таулу кызыны хорламы



сёзсюз, уллу жерни аладыла, ол кеси да экинчи жерге чыккыганды.

Биринчи кюнден окъуна кесине эс бурдургъан, Нальчикде 73-чю номерли учреждениясыны ишчиси Айна Бельтоева дерслени алаамат бардыргъанды. Аны хунерлери бек кёпдю. Жырлагъан, тепсеген да, актёрлукъ хунери да болгъан кыызгъа ючюнчю жерни бердиле. Бахсан шахарда 1-чи прогимназиядан Ольга Васильева да конкурсну лауреаты болду. Бу назик тиширыучукъ сабийле бла ойнау халда республикабызда жашагъан ненча миллет бар эсе да, хар бирини бир ариу шартын ачыкълай, сабийлени къуандыра эди. Быллай конкурсла бардырыла турсала, юретиучюле бир бирлерини ишлерин кёре, устазлыкъ хунерлерин ёсдюрлюклери сёзсюздю. Биринчи жерге чыккыгъан Гуппойланы Асият а Москвагъа Битеуроссей конкурсну къырал даражалы кезиуюне республикабызны атындан къатышырыкъды. Хорлам бла къайтырынгы сакълыйбыз, Асият!

"Нюр"

орта школуну «Радуга» атлы сабий садны юретиучюсю Гуппойланы Асиятха бердиле. Ол ишде Асият жыйырма жыл ишлейди. Кесини ишин бек сыйгени кёрюнюп турады.

Тырныаузну 3-чю номерли школуна бойсунган сабий садда ишлеген Элеккуланы Наталья, тынгылы, ишин билген юретиучюдю. Андан сора да сабийлеге психология жаны бла ойнау халда дерслери,



Суратланы ХОЛАЛАНЫ Марзият алгъанды

«Нюрню» нюрлючюклерине

Бусагъатда элбер айтыучу ыннала, аппала, аккала, ата-анала, элли-жерлени атлары, элберле да азая баргъанча кёрюнедиле. «Нюр» журналны бу санында алыкъа сиз эшитмеген бир ненча элбер эшитирексиз. Ала окъуу-билимге чакъыргъан элберледиле.

1. Акъыллы ала барыр,
Акъылсыз къоя барыр.
(Билим)

2. Айтсам, менден кетер,
Ангыламансанг, сенден кетер.
(Сёз)

3. Жери – акъ, урлугъу – къара,
Къол бла себилер,
Аууз бла жайылыр.
(Къагъыт, жазыу, окъуу)

4. Терек туююлдю, чапыракълары
барды,
Тон туююлдю, тигилгени барды.
(Китап)

5. Тили жокъду, ангылата биледи.
(Китап)

6. Гитче кюбюрчекчикге дуня
сыйынады.
(Китап)

7. Ауузу бар, тили жокъ.
(Сырыйна)

8. Къат-къат къатлама,
Юсю бла атлама.
(Китап)

9. Тенгизи бар, суу жокъ,
Шахары бар, халкъы жокъ.
(Карта)

10. Тенгизи бар – жюзалмайса,
Жолу бар – жюрюялмайса,
Жери бар – сюралмайса.
(Карта)

11. Аягъы болмагъанлыкъгъа, кетер,
Айтханынгы этер,
Жиберген жеринге жетер.
(Къагъыт, письмо)

12. Табакъгъа тюшмейди,
Аны ашамагъан ёсмейди.
(Ана сют)

13. Къулагъы жокъ – эшитеди,
Ауузу жокъ – селешеди...
(Радио)

14. Битип чыгъады шахардан,
Ичи толуду хапардан.
(Газет)

15. Ауузу жокъ,
Къолу жокъ,
Жыл къайтарады.
(Орузлама)

16. Бир сабан агъач бла
Беш ёгюз сабан сюреди.
Жерлери – чыммакъ,
Урлукълары – къап-къара.
Ол урлукъланы ким чачса,
Ол акъыллы болады.
(Жазыу)

ЖУЛАБ улу Юзейир





ЖАБОЛАНЫ Асият

АММАМЫ ХАПАРЫ

Мени аммам дунядан кетгенли, кѡауум жыл болады. Мен аны бир заманда да унутмайма. Ол ырахатлы, огъурлу адам эди, жаннет чырагъы болсун! Биз, аны бла бирге арбазда кюн туушда олтуруп, кѡп хапар айтыучу эдик. Улпугъа, гитчеге да хурмет эте билирге, абадан адамгъа, кѡбуп, жеринги бере билирге, сабийлени башын сыларгъа, тизгинли болургъа, дагъыда анга кѡре кѡп затланы юсюнден.

Аны хар сѡзю да мени бюгюнча эсимде турады. ...

Бир жол школда, аппаларыгъыздан, аммаларыгъыздан сюргюнде болгъан кезиулеринден хапар соруп, аны дефтерге жазып келигиз деп, юй иш береди. Мен да келеме кесими жанымдан да татлы кѡрген аммачыгъыма. Аппа ол кезиуде юйде жокъ эди, алай, тюзюн айтсам, ол артыкъ кѡп хапар айтыргъа да суй-

меучю эди, артыгыракъда сюргюнде болгъан жылларыны юсюнден.

Амма, кёзюме къарап: «Санга ненча жыл болады?» – деп сорду. «Аммачыгъым, унутупму къойгъанса, алгъаракъда туугъан кюнюм бла алгъышлагъан эдинг да мени? Манга онюч жыл толгъанды!» – дей, мен аны къаты къучакъладым.

– Унутмагъанма, жаным, унутмагъанма, мени суйген къарылгъашчыгъым. Сени жыл санында кёчюрюлгенме мен, – дей, хапарын алай башлады. Мен да андан эшитгеними жазып алдым.

Ол атасы, анасы бла эм гитче эгешчиги бла Къазахстанны ара шахары Алма-Атагъа тюшген эди. Атасы къурулушда ишлейди. Анасы уа, жюн затла эшип, базарда сатыу этеди. Къызла да анга болушалгъанларыча болушургъа кюреше эдиле. Сатыулурындан тюшген ахчагъа аш ала эдиле.

Кюнлени биринде быланы жууукъ адамлары келип, былай айтады: «Элге барайыкъ, колхозда ишлейик, анда хайыры иги боллукъду», – деп. Аны айтханы бла аммамы юйюрю Шимал Къазахстаннга кёчеди. Элни юйлери колхоз къошлагъа ушай эдиле ансы, элге да ушамайдыла, кеси да сууукъ жер.

Бек къыйналыргъа тюшдю. Атасын, анасын да фермагъа ишге алдыла. Элде школ болмагъаны себепли, къызчыкъла да, ийнек саууп, абаданлагъа болушлукъ болдула. Кеслери уа кече, кюн да школ къайгъы этедиле, Алма-Атадан кетгенлерине жюреклери къыйнала. Анда школ болгъанына, аталарыны эгечлери да анда къалгъанына.

Не да болсун, артха къайтыргъа керекбиз дейдиле.

Элден тышына жибермейдиле да, къалай кетерге билмейдиле. «Бир кюн ийнеклени саугъандан сора, кишиге да кёрюнмей, эл аягъына барырбыз. Сора, уллу жолгъа чыгып, адамладан сора, Алма-Атагъа жолну билирбиз. Алай бла атабызны эгечин табарбыз», – дейди аммамы уллу эгечи.

Кюнлени биринде тюз айтханларыча этедиле.

Иги кесек жол баргъанлай, башларындан кюн къыздырып тебирейди. Сабийле жол жанында олтуруп, суу ичип, бир кесек солугъандан сора, жангыдан жолгъа атланадыла. Кюн а къыздырадан-къыздыра барады, ауанасында бугъарча уа тегерекде бир деп бир терек жокъду. Жаланда къуру тюзле.

Экиндиге жууукъ бола башлагъан кезиуде узакъда бир арба кёрюнеди. Ол жууугъуракъ келгенде, къызла бир жанына къачадыла, болсада арбачы аланы эслейди, ызларындан къычырып да кюрешеди. Алай ала узакъ къачып кетедиле. Эгечлени гитчелери таматасына соралды: «Не эсе да ол адам «къаскъыр» деп къычыра эди. Ол а не затды?»

«Баям, къайтыгъыз дей болур эди», – деп, тамата эгечи жюрюшюн тохтатмады.

Арбачы да, къычыра кетип, жолуна кетди. Азмы-кёпмю бардыла, ким биледи, ингир ала болду, тегерек къарангы бет ала тебиреди. Жолоучула кече къалыр къайгъы эте башлады-

ла, алай кѣзкѣргенде не дуппур, не терек тапмайдыла. Дагъыда бир кесек баргъандан сора, гитче эгечни кѣзюне бир къарелди кѣрюнеди: «Баям, ол таш болур, ары бир барайыкъ», – дейди. Шо, ол да аны айтыр-айтмаз, ызларындан бѣрю улугъан таууш эшитилди. Аны ызындан а экинчиси, ючюнчюсю, тѣртюнчюсю... Жюрекге уллу къоркъуу кирди...

Эгечле, бир бирлерине къарап, къарелди таба чапдыла. Бѣрюле уа, бирде улуй, бирде тохтай, жууукъдан-жууукъ жанлай келгенча кѣрюнедиле. Къызла къарелдиге жетселе, ол а бир оюлгъан юнню хунасы. Кѣп сагъыш да этмей, ала ол хунагъа ѳрлейдиле. Ала да ары минер-минмез, бѣрю жыйын да быланы ызларындан жетди. Жаныуарла, хуна аллына сюелип, бирем-бирем ары секирип, къызланы тутаргъа кюрешедиле. Ала уа, асыры къоркъгъандан, бир бирлерине кысылып жиляйдыла.

Тѣгерек къаппа-къарангы болгъанды, андандамы кѣрюне болур эдиле къызлагъа жаныуарланы кѣзлери отда мыдыхлача кызылла болуп?! Бу эки сабий да жашаудан тюнгюледиле, гитче эгечи сорады таматасына: «Бѣрю къапса уа, ачытамыды?» – деп. Ол да айтады: «Сен къоркъма, хунадан къаты тут, жыгъылмазгъа кюреш, мен а юслерине секирейим. Ала мени ашасала, санга тиймезле. Танг атса уа, элге къайтырса».

Тамата эгеч айтханыча этерге да болур эди. Алай ол кезиуде жырт-

хычланы бек уллулары, олтуруп, башын да кѣкге тутуп, улуп тебиреди. Къызчыкъланы жюреклерине андан да уллу къоркъуу салды. Бир заманда ол, улугъанын кѣюп, ѳрге кѣопду, аны кѣрюп, башхалары, – анга жол кѣойгъанча, бир жанына турдула. Баям, ол жыйын башчылары эди. Сора, кѣкюреги бла уруп, хунаны бирси жанына аудурду. Къызла да, эс жыйып, ѳрге кѣопсала, бир терен уругъа тюшюп тура эдиле. Бурун алайда жашагъанланы урулары болур эди ол, ким биледи... Жаныуарла ары секирирге базынмайдыла. Кетип да къалмайдыла, уруну тѣгерегинде улугъанлай айланадыла. Эгечле да, бир бирлерине кысылып, мюйюшчюкде олтурупдула. Бир заманда ит юрген тауушла чыкъдыла, ала жууукъдан-жууукъ бола башладыла. Къызланы аталары атларын айтып кычырады. Аны эшитгенде, эгечле да хахай этедиле. Урудан чыгъып, аталарыны аллына чабадыла.

Иш а былай болгъан эди... Къызла жолда кѣрген арбачы, кычырып, быланы къайтаралмагъандан сора, элге жетгенлей, адамлагъа: «Таулу сабийлени кѣргенме. Ол тийреде элжурт жокъду. Тас болуп къалырла, ызларындан болмасагъыз», – деген эди. Аны хайырындан табылгъан эдиле къызла.

Ала окъургъа асыры суйгенден, артда аталары Алма-Атагъа эгечине кеси элтип, школгъа жюрюрча этген эди. Къаскъыр къазакъ тилде бѣрю болгъанын да ол школда билдиле.

НЮРЛЮЧЮКЛЕ-ТЮРЛЮЧЮКЛЕ

Бёзюланы Исхакъ насыплы атады. Нек деп сорсагъыз, ол юч жулдуз атлы къызчыкъны атасыды. Лейла, Джамиля, Амина керти таулу атлары бла республикада эм аны тышында да кёп тюрю эришиуледе, конкурслада эм окъуу жаны бла да биринчи жерлени аладыла. Сёз ючюн, Лейла бла Джамиля RT Models школну бошагъандыла, сабий моданы конкурсунда тыш къыраллада да, Россейде да биринчи жерлени алып къайтхандыла.

Амина 3 жыл

Бек гитчечиклери Амина тамата эгешчиклерини ызын алгъанды. Барысы да Нальчик шахарны "Радуга" атлы школунда окъуйдула. Окъууда да биринчилени санындадыла.

"Нюр" журналны бек суюк окъуйдула.

"Шагди" атлы тепсеу ансамблде 4 жылларында тепсеп башлагъандыла.

Грузияда бардырылгъан Orange Kobuleti 2016 халкъла аралы фестивалда, Къырымда "Алтын Майданда" да, Стамбулда да ариу тепсегенлери бла кеслерине уллу эс бурдургъандыла.

Лейла 10 жыл

Джамиля 8 жыл

Бу бетни ШУРДУМЛАНЫ Фатима хазырлагъанды

СЕН А СУРАТ ИШЛЕЙМИСЕ?



*Къулийланы Хусей
5 класс, Экинчи Чегем эл*



*Атабийланы Камилла 1 класс,
МКОУ СОШ №20*



Гаджикурбанланы Зухура, 5 класс, Экинчи Чегем эл

Багъалы сабийле! Жай айлада солугъан кезиуюгюзде тѳгерекни ариулугъуна эс буругъуз. Бизни Ата журтубуз ѳмюрледен бери айтыла келеди табийгъатыны ариулугъу бла. Кюз артында «Нюр» журналны редакциясы сизни солуу заманыгъызда ишлеген суратларыгъызны сакълайды.



Нальчикни 75-чи прогимназиясыны сабийлери

Багъалы ата-анала, устазла, сабийле! 2019 жылны экинчи жарымына адам аз жазылады деп жарсып турдукъ. Бюгюнлюкде эки мингден ётдю журналны саны. Ол иги шартды. Нек дегенде, "Нюрде" басмаланган затланы сиз бир башха жерде табаллыкъ туююлсюз. Тилни, адепникъылыкъны билирге, тынгылы адам болуп ёсерге юрретеди "Нюр". Мындан ары да журналны алып турлугъугъузгъа ийнанабыз.

"Нюр"

Ежесмесичный литературно-художественный журнал для детей

«НЮР» («Свет») № 7–2019 г.

Выходит с января 1982 года
На балкарском языке

Учредитель:
Государственное казённое учреждение Кабардино-Балкарской Республики «КБР-Медиа»

И.о. главного редактора
А. А. САБАНЧШЕВА

Редколлегия:
Л. АХАЕВА
А. БЕГШЕВ
М. БЕШШАЕВ
Т. БИТТИРОВА
Ж. ГУЗЕЕВ
А. МИШШАЕВА
М. ОЛЬМЕЗОВ
Оформление
И. АККИЗОВОЙ
Компьютерный набор и вёрстка
А. МИШШЕВОЙ

Журнал зарегистрирован
Управлением Федеральной службы по надзору в сфере связи, информационных технологий

и массовых коммуникаций по Кабардино-Балкарской Республике
Per. ПИ № ТУ07-00124 от 11.01.2018 г.

Сдано в набор 14.06.2019
Подписано в печать 05.07.2019 г.
Выход в свет 30.07.2019 г.
Формат 60x90 1/4
Бумага мелованная
Гарнитура литературная
Уч.-изд. л. 2,7
Тираж 2145 экз.
Заказ № 292
Индекс 73908

Стоимость одного номера по подписке через ФГУП «Почта Россия» – 14,83 руб.; за 6 месяцев – 88,98 руб.

Адрес редакции: 360017, г. Нальчик, пр. Ленина, 5. Тел.: 42-37-27; 42-14-19. aripa.sabanchieva@mail.ru

Адрес издателя: 360017 г. Нальчик, пр. Ленина, 5. ГКУ «КБР-Медиа». Дом печати.

Отпечатано в типографии ООО «Тетраграф» 360000, КБР, г. Нальчик, пр. Ленина, 33

Отпечатано в полном соответствии с качеством предоставленного электронного оригинал-макета.